

書



序

汪子柯庭東南文士也乃其筮仕則司曰兵馬官  
曰指揮似乎武弁之職而實無一兵一馬蓋文吏  
而兼干掇專理民事若州縣長吏然簿書冗沓聽  
斷不暇所莅北城又最號繁劇余素疑汪子文士  
不當居是官汪子亦鬱鬱不自得思旦夕舍去無  
何爲他城同官牽累鐫秩改散曹余反爲汪子喜  
汪子亦深自喜曰今而後吾得釋簿書而日親筆  
墨矣余向讀摛藻堂彙及古香樓初彙見其詩典



古香樓吟稿  
雅韶秀有自適之趣深喜之今讀古香樓續稿益  
有當於心汪子曰吾詩惟自適爾余曰然誠知所  
以自適則學唐人而能如李杜高岑固為上乘即  
不然如浪仙東野縱曰寒瘦亦不失為名家若如  
近代之規模王李者徒襲浮響了無自適之趣尚  
得謂之詩乎吾見今之為詩者學唐則多宗義山  
飛卿學宋則多宗東坡放翁使其果如數子疇不  
稱善但恐學溫李而止得其浮華學蘇陸而止得  
其率易則兩者胥譏是在作詩者以我之性靈馭

千古之詩人不以一古人之詩閱我之性靈是之  
謂真詩知我者謂我學古人可即謂我不學古人  
亦可蓋以古人之詩為我之詩固貽識者之誚即  
以我之詩使人擬為古人之詩未始不貽識者之  
誚也汪子深於詩者其詩取自適其性靈而不蹈  
襲前人余故放論至此吳興溫鄰翼先為汪子作  
序并以此示之其不以我為狂言乎四明同學弟  
萬斯同具草



詩與文體格雖異而指歸則同要為有用於世而已孟子曰詩亡然後春秋作詩之於春秋若大徑庭然而孟子之言云亦曰其義則同乎爾繼三百而離騷興本此義也推是為漢魏樂府古詩推是而唐宋大家雜然竝起莫不掀風雷而揭日月亦云變矣要皆本詩與春秋之義而陳法戒備諷喻窮情抒性研形畫態而一代之興衰理亂賢奸佞直與其人之歡怡愁苦無不畢現於前使人讀之而若與之上下其間者其斯詩之為詩也歟而後



之論者乃始瑀鏤字句刻劃風雲又從而爲之說  
曰詩不可以着議論嗟乎彼且不知詩之義而漫  
焉執其小知蔽其大知以訾議古之作者其亦不  
忤矣哉汪子柯庭示余古香樓續彙其琉璃廠賑  
濟諸什雖元次山春陵行白太傅秦中吟無以過  
之惻惻乎仁人君子之心也夫柯庭一徼循職耳  
觸乎目之所見而其言已如是使其得志而宰廟  
堂其肯泄泄然坐視天下之阡危而曰此非余責  
也乎吾於是知柯庭之深於詩與春秋之義者若

其感物懷人風流詠歎味之無盡浸浸乎入作者  
之室矣今天下家握隋珠而揆之詩人之義輒齟  
齬而不合余故揭其義以告之使世之讀柯庭詩  
者知有所本而取衷焉辛巳初秋吳興同學弟溫  
睿臨題於燕臺旅館







體不工古人有言詩必窮而後工則工詩者宜莫  
予若乃予窮詩愈不得工汪子旦晚將登仕版銘  
鐘勒鼎而所吟輒工若此古人其欺予哉蓋聞一  
書之不見一物之不識一理之不窮於詩皆有憾  
焉如吾汪子其可無憾也夫武林同學弟王暉拜  
書

汪子柯庭向以養疴閉關十年靜處一室乃得考  
核古今博綜物理以及釋老籒籀亦得單刀直入  
於是渣滓既去清虛日來病不治而躍然以起間

嘗舉所蘊發爲詩歌氣充力厚使人盪胸縮鼻莫  
與爭衡雖詞壇老將亦爲之倒幟然後知向之病  
非厄之也天所以養其學欲將以有爲也嗚呼吾  
因之而有所感矣蓋以斯世疴羸日甚而未知求  
三年之艾因循之而不愈更張之而益不愈其故  
何耶致病深也苟得良醫培其本而去其邪不難  
趨於強固之域矣今柯庭筮仕有日其才其學自  
足以善俗將以治身之道而爲治世之方則是集  
爲參苓之左券斯誠清廟明堂正始之音也寧僅



詩家奉爲宗匠乎哉吳門同學弟黃珍題

汪君柯庭家桐川時往來茗上至則必造予齋示所著詩泯泯乎大雅之音也去冬復得讀其近作清新淵異語輒驚人往往若穿天心出月脇非尋常摘句家所能及君與予交者十餘年矣其爲人亦類其辭章皇甫持正之稱顧况也以爲翕輕清以爲性君亦猶是耶詩者性情之發也君之得於性情者如此則其詩之絕俗也固宜蘋洲韓純玉吾長城之詩人寓公較著即如唐之陸魯望明之

劉南坦皆詩人也則皆寓公也迨其後悅長之風土清嘉買田築宅以世其子孫則微特寓公也直里人也司城汪君柯庭喜攻詩余最嗜其詩與之訂交久重其品則愈嗜其詩蓋始以寓公目之旣乃以里人望之者也夫何長城之居火柯庭遂不悅居長城尋拂袖去長城願爲桐之人以老余過桐出近詩二百餘首示余余讀之率多山川亭墅遊歷之詩以暨桐谿酬倡之詩而絕少吾長城之詩是柯庭果無意於長城也吾長城人易言詩而



余獨不肯易言詩故常脉脉無一語及詩所間與  
言詩者爲周荻書老友荻書者亦柯庭友也余與  
荻書固日望柯庭之爲長城詩也柯庭即無意於  
長城獨無意甫里先生與坦上翁之爲寓公平哉  
若夫詩之性靈流露其資捷其學贍則有諸詩人  
之弁言在余旣不工詩抑不敢易言詩而又惡乎  
贅言詩同學弟臧廷鑑書

吾友張子曉廬不苟譽人者也嘗盛稱汪司城柯  
庭瀟灑絕俗嗜古好讀書吟詠其天性也余企慕  
久之不丁軟紅以未得相見爲恨丁丑冬自楚抱  
病歸偃卧小樓呻吟不出者累月次年夏柯庭適  
寄古香樓橐一編至支牀讀之讀未竟輒躍然起  
比於陳檄療頭風更捷也柯庭詩天資朗悟大抵  
從禪理證入於有字句處嚴結撰無字句處領神  
韻故能自出機杼興會所到伸紙疾書不屑蹈襲  
古人而於古人又未嘗不吻合者讀其詩想見其  
人柯庭洵移我情而益信曉廬之言爲不虛已異  
日輕舟造訪尚思坐屐硯齋中把酒一共論之水



村弟魏坤書

柯庭先生夙具淹雅之才精抉經史之奧諸子百家書無所不考延致天下士相與討論倡酬每寒暑不輟所著述最富俱各極其妙今丙子秋杜門謝俗鞅日事吟哦甫越兩月遽得詩二百篇有奇秋杪拏舟奉訪出以示予沐手敬誦第覺氣格高古意致纏綿不屑襲人牙後一語斯真所謂矯然自命者也予究無能窺其根柢之所至爾鴛水沈兆麟拜橐

古香樓吟藁卷一

休陽汪文柏柯庭

古香樓

何物滿高樓宋鐫與秘錄青藜最可人黃妳吾所欲香清凝座隅色古悅心目焉敢傲百城擁書聊自足

展硯齋

曲水通花徑幽閑亦可詩誅茅貯片石孰謂我非癡清賞供晨夕嗜痂誠有之空悲梧竹老鳳兮來



何時

容忍居

有容德乃大有忍事方濟此出孔壁書名居當自  
勵圮橋業可傳跨下功非細褊淺安能成身名皆  
所係

抱月窩

石屋聚秋輝冰輪如可抱自偷靈藥飛不見嫦娥  
老此夜千江明誰家雙杵搗金波湧客筵舉觥承  
清顥

雙桂軒

桂陰書案涼愛此軒楹古外物苟無營一閑天自  
與密葉蒙淡煙生香潤疎雨徐吟招隱詩伊人渺  
何許

聽松堂

堂前三古松青靄四簷及客起爲誰驚喧逐如海  
立無首見神龍巨浸憑吞吐把卷坐蒼涼滿衣疑  
翠濕

聞盛宜山瓣香菴落成却寄



短髮有家僧無兒老居士鐘魚間罇壺梵筴雜經  
史青眼盡詩人緇衣多弟子聚貲構草堂爲君安  
暮齒穩作南湖翁瓣香有飯耳郡守不可招况乃  
舊知己何事而畏人自云吾老矣儘多垂白年奔  
競軟紅裏不避猿鶴嘲翻爲權貴鄙生憎冒隱淪  
言高非所履遯世老菰蘆如君庶幾是水竹淨閑  
居詩情入禪理蒲團面瞿曇竹篋叅妙喜從知最  
上乘悅久味逾美揮翰摹華亭遊戲得神髓春明  
少尺書吳會爭片紙懷君成短吟寒波待雙鯉翹

首少微星清光照湖水

寄項東井用前韻

憶我少時狂納交湖海士徵歌款酒徒挾妓脩花

史剝啄問誰來查生及項子

丙辰春韜荒  
借東井枉過

初遇曹司

農

倦圃  
先生

說項不去齒從游固多賢兩浙推牛耳惟君

才品殊屠羊善約已吁嗟哲人萎歲月誠多矣巍  
然老獨存雙鬢茶煙裏詩格最新奇陳言真足鄙  
杜韓光燄長學步追前履一字可驚人千秋只此  
是餘事足消閑畫中具深理窗明興欲飛硯潔時



可喜毫端煙雨濃  
腕下山川美  
我有已裝潢  
愛之入骨髓  
倘遇墨池閑  
更寄羅紋紙  
卧遊入三湘  
尋詩窮九鯉  
令我彈指間  
百城歷煙水

懷潘厓山用前韻

西吳有遺民  
賣藥潘道士  
醫傳肘後方  
詩寓前朝史  
垂老喜無家  
梅妻鶴爲子  
苕溪石粼粼  
漱之將礪齒  
雪水波瀾瀾  
枕之堪洗耳  
不惜爲人勞  
達者原無已  
筋力儘康強  
何曾歎衰矣  
前年過敝廬  
坐話松影裏  
聲如扣玉環  
品論嘲俗鄙  
謂予骨格奇

勗我慎操履  
可以致神仙  
此言未必是  
幼習紫陽書  
去欲存天理  
學道三十年  
依然見獵喜  
棲棲何所爲  
抱此璞中美  
先生物外流  
餐霞服石髓  
箋成金碧文  
課抄日數紙  
不騎王晉鶴  
定駕琴高鯉  
揮手謝塵寰  
遨遊窮弱水

感舊用前韻

當年客草堂  
老友周青士

箕

松陵徐臞菴

崧

先輩

俞南史

無殊

涵輝及雪坡

過澤克顧文淵

旅農與山子

俞場沈進

刻燭

總忘年寫箋  
還敘齒雄才  
泣鬼神聲譽  
灌人耳妙



手對知音美容逢悅已座滿樽不空自謂無憂矣  
奇懷在酒邊好畫潛詩裏千古事相期時名皆所  
鄙贈遺只縞帶坦步無珠履豪華金谷非雅集玉  
山是七子六古人殘編吾獨理半世歎沉淪一身  
荷悲喜所剩惟雪坡蒹葭懷有美雄心消已殘骨  
折存膏髓仲子作衰翁兒曹鑽故紙叔兄倅桂林  
書斷湘江鯉時缺音書甚繁懷抱感舊強裁詩悲歌淚如水

紫滄叔翁以教習赴館過予話別

族誼兼文字經過願少畱露涼燈影淡荷淨酒香

浮仗劒辭黃海裝書壓紫驕幾回勞我夢殘月踏  
蘆溝

東王丹麓二首

西湖秋氣爽王子近何如雲樹雙扉遠音書七載  
疎竹樓聽鴈過瓜圃帶煙鋤倘值郵筒便新吟可  
寄予

我滯吳興客虛君艤畫船至今懷舊雨何處釣寒  
煙酒盡花偏好人稀月故圓攜書當就正觴詠共  
林泉



北寇蕩平恭紀五十韻

絕塞戈矛動朔方似倒懸撫綏頻下  
詔沛澤屢加憐祗冀皈誠速何期叛志堅  
皇心斯震怒廟算在幾先策定須  
親討師行果利便龍旂搖繡幌  
鳳輦擁花韉麾燾懷俱壯貌貅技素儼  
禁幃頒玉節內帑發金錢驛路無纖擾  
鑾儀有細旃駐屯黑水外瞻眺賀蘭巔  
舊勒天山碣新嘗靈濟泉謹嚴凌細柳  
籌畫吐青蓮睿斷謀書漆竒兵甲用綿  
渠魁初喪膽輔翼漫隨肩聞

幸拖林近思逃巴嶺遄本軍橫截出寇卒止齊愆  
器械多拋擲妻孥失保全狼奔趨北路鼠竄轉西  
淵擊刺鋒流電長追塵和煙重兵犄角鎮警蹕  
凱音還慶喜盈朝宁歡呼浹市塵冥頑終未悟  
殘喘尚貪延望救雖無術強梁恃有權匿於沙漠  
地外此蔚藍天聖慮拯湯火乘輿復狩田劫糧  
知食窘投帳識情煎約信孚餘黨恩榮許授員險  
哉惟首惡降矣又迤邐進勦寬俄頃殲除俟次年  
白旄勤往返黃鉞疊躡蹻巷舞看難足衢歌聽益



娟始征三伏盛再出六花翩總爲蒼生計寧安  
高拱眠即今當二月更復越三邊 方略人誰及  
精微著莫前狼居營壘固胥巘羽干連左右皆  
虓虎戎行演率然風靈旗幟滿震號鼓聲填我帥  
纔冲陣伊男立就孿獻俘光耀戟折馘猛揚鞭賊  
勢尤窮蹙驚魂自播遷象刑知及體鳩毒遽吞咽  
驗見遺骸實芟茲蔓草纏臣民咸踴躍將士樂回  
旋亙古威真壯如神智獨宣一隅休介胄萬國整  
車船表奏遙申賀犧牲矢告虔 大官分賞賚

中使饋肥鮮求治辭 尊號稱功待鉅篇巍巍堯  
竝駕蕩蕩舜同駢

聞嘉禾霍舜卿坐脫兼悉其令子文江有剗  
股孝行援筆記之

同生大化中俱嬰塵網累任彼渴鹿馳勞勞不知  
止云何得安心畢竟空門是攜李有畸人曰惟舜  
卿氏好善法東平聲譽滿鄉里利濟無倦時德被  
翳桑起倉猝叩門求緩急良可恃孝思尤所難寧  
止勤滸瀨父書與栝棧珍重敢褻視投分必正人



義方勗諸子江河流日下有此振奇士  
扼貌而蠟言觀此應懷恥晚年歸白業  
見月不眩指千偈翻水如一室毗耶似  
有髮在家僧精進誠莫比如翁合長年  
報齡何遽駛沐浴具衣冠從容謝知已  
了無塵俗戀舉手三叩几去來何自由  
飄然如脫屣見者爭咋舌異事傳人耳  
象教從西來心空具奧旨世人得其粗  
輒以異端視不知妙性圓儒釋總一理  
况有孝子賢割股以自矢輜軒如採風  
勝事堪垂史寒燈夜吐芒泚筆記茲美

壽查梅壑八十

天都峰下一神仙跨鶴揚州不計年  
採藥有時丹有訣烹茶無色香無煙  
米顛倪瓚前身是賈客千金爭一紙  
意到神行凌古人塗鴉畫犬啗羣史  
班荆話別平山堂照眼霜花五度黃  
寄予畫冊真神品惜墨如金寓意長  
葭莢蒼蒼秋水隔煙雲供養蓬山客  
車馬喧闐鐵限門乘興含毫難促迫  
老我棲遲鬢已華清谿射鴨與撈蝦  
堯年甲子推初度天末題詩勸紫霞



得雪坡書有懷

山人書報我未束遠游裝夜雨懸江黑秋花壓徑  
黃詩窮甘澹泊地僻縱疎狂舉網新鱸美思君繫  
野航

夢東燦

楚客無歸信中宵夢見之匡廬千仞翠彭蠡片帆  
遲練達才須試馳驅爾不辭雨聲疑絮語欹枕遂  
成詩

夢遊漢陽

江抱晴川閣城依黃鶴樓最憐天下勝偏作夢中  
遊霧起帆難辨波生樹已秋窗前雞喔喔喚我大  
刀頭

聞菰城書屋雙桂盛開寄二兄

老屋交雙樹濃香散四鄰扶疎秋自爽掩映月難  
勻醉賞懷姜被閑招墊郭巾膽瓶如折寄寒夜一  
燈親

索居

方罨閑秋墅偏提倚暮窗索居無意緒衰柳尚成



雙

山塘夜泊

涼風吹枕簟青舫艤煙霞旅析驚鄉夢檣燈照荻  
花魚雲籠月淡雉堞枕江斜舟子來何速山塘近  
酒家

劔池

深池冷浸千年鐵夜靜寒光噴帶嶧寺樓高影半  
藏雲石壁疎花如點血斟酌橋邊一笛吹第三泉  
畔蒼崖裂我來吸月坐坡陀杯面涼風吹一呷祥

金百鍊鑄初成要使神鋒淬清冽土花剝蝕歎沉  
淪滿眼盤根兼錯節歐冶良工今絕無那得魚腸  
助英傑

漢玉剛卯

後漢輿服志漢承秦制上下各佩雙印乘輿諸侯王  
公列侯以白玉中二千石下至四百石皆以黑犀二百石

至私學弟子以象牙上合絲乘輿以滕貫白珠赤罽諸侯王  
以下以絲赤絲罽滕絲各如印質以正月卯日作其文曰正月剛  
卯既決靈及四方赤青白黃四色是當帝令祝融以教夔龍庶  
疫剛瘳莫我敢當疾日嚴卯帝令夔化慎爾周伏化茲靈及既  
正既直既觚既方庶  
疫剛瘳莫我敢當

昆吾初試春王卯玉箸數行最精巧佩之疫癘莫  
敢當氣血調和謝醫禱秦漢相沿成服制玉貴犀



次牙爲眇犀牙易朽後代無惟玉堪傳真足寶血  
花侵透觚稜倒小篆文深猶了了侯王遺佩出畊  
犁玉盃金鳧洵難保摩揩雙眼看逾好真贗分明  
吾稍稍近來博古盡朱門廟市搜求悔不早

贈楊聖與

野老多吾友潛夫爾可傳桑麻三畝宅鮭菜五湖  
船酒箏當秋月書燈接曙煙花時來往數瀟灑任  
華顛

贈張炎貞

手編何日釋老眼似寒星髮以成書白衫猶破國  
青藏花園卧榻勗志勒齋銘隔牖諸孫課呬唔最  
可聽

贈姚肆夏因借張考夫先生語錄

從學楊園久幾人共入林神寒高館靜骨傲古衣  
深息影甘匏繫無心託磬音老成難再見規範向

君尋

五六句指  
考夫先生

肆夏過有作

十載離城市今朝過草堂名齊高士傳貌稱野人



裝履響梧摧葉舟行桂送香檢書淹促膝談笑豈尋常

待叔兄信不來悵然成句二首

邊隅思薄宦音問抵南金元亮腰應折洪喬信每沉峰明猶獨秀桂缺不成林憂至心如搗那堪聽

急碁

獨秀峰八桂堂俱在桂林城內

梧竹西莊好縹緗尚滿樓半生驥子淚千里鴈書愁吏隱惟卑牧官閑罷巧謀斷機思幼學吾亦暫淹畱

訪桂

信步之何所西郊處士莊橋能欺足軟門不掩花香風捲疎煙碧雲陰細雨黃可能容醉卧爲我置匡牀

斗室

五車供寓目斗室可棲神力盡瓶花落年深籠鳥馴養心閑是主接物用爲賓放下能無事何愁日應頻

夜



樓陰弦月上秋宇  
漸鮮澄桂影移  
疎檻蟲飛聚一  
燈霧香煎紫筍  
雨過冷青綾  
羣動時初息  
鐘聲夜  
課僧

貽石巢次圭菴韻

相視何軒渠  
相忘爲道術  
吾友山林人  
神閑意坦  
率發蒙猶子  
羣靜躁變其質  
幼學壯而行  
百年無  
暇日  
古人自胎教  
何況居親膝  
俞君師範賢  
善誘  
誰與匹  
家塾黃圭菴  
信堪共纂述  
和風春滿幃  
秋  
火夜開帙  
諸子百家書  
丹鉛羅甲乙  
金粟漸吹香

清高氣蕭瑟  
籬落一樽同  
有懷皆可悉  
共此荒城  
中無爲坐相失

張權六寄小札偶成

層陰散廣除  
一鴈下茅屋  
張子篤交情  
因風貽小  
牘  
芳訊吐氤氳  
恍若臨空谷  
促我棹菰城  
盤餐分  
苜蓿宮牆桂  
已花  
巨甕酒初漉  
矧予有舊廬  
雙槩  
往來熟門迴  
波鱗鱗窗  
虛松謾謾何  
故尚逡巡  
睽  
離殫家塾  
欲附歸鴻音  
情長意亦逐  
不如手一編  
玩易忘幽獨



小飲

小飲逢佳客清言共夕陽水流松影在門掩稻花香  
香謁少懷無刺租輕鶴有糧一編吾計足安坐管  
寧牀

懷韓子蘧

高卧蘧廬叟何時共把杯同雲愁塞鴈淡月寫窗  
梅花徑人難到書城坐不墮最懷明淨處斑駁古  
罇罍

凍蝶

衣單金粉退冷落黏枯叢催汝何太急霜寒一剪  
風魂猶戀衰綠氣已殉殘紅漆園新夢覺香斷玉  
堦空

殘蜂

天寒花蕊稀股空不成返霜葉却如花賺汝歸來  
晚儔侶豈飄零君臣時繾綣擁聚蜜房深底事孤  
飛遠

枯荻

蕭蕭乾葉卷頓覺谿容瘦花搖水落深榦枯風易



什不礙撈蝦人  
筇簪隨所就  
根固啗寒波  
待看他時茂

衰草

細徑零朝露  
荒原橫凍煙  
綠消霜降後  
紅淡夕陽邊  
香車寂寞久  
野火凋殘延  
攜朋話疇昔  
列坐當寒壇

癡蠅

營營勢已衰  
隻影愁難育  
點屏或可疑  
拔劍無煩逐  
隙曛射窗明  
鼓翅猶瑟縮  
安能廣霜威  
盡使醜

類伏

斷鴈

接翅儼成書  
忽被朔風斷  
江濶暮雲低  
哀音尋爾伴  
奈我此時聞  
孤燈挑旅館  
數點落蘆花  
前汀明月滿

落葉

狂風走疎林  
聲乾不似雨  
箕帚片時閑  
又見一庭聚  
熱火向寒爐  
烹茶呼小豎  
仰視鵲巢圓  
歷歷時堪數



冷楓

照眼古楓林漠漠霜紅冷  
光采染溪長亂飛隨雨  
猛根畔縛香茅夜映龕  
燈耿幻色近凋零童顏當  
自省

寒蟲

露冷草根枯陰蟲移暗壁  
振羽不成音宵分聽更  
感欹枕有羈人播遷非所  
適愁吟東野詩淒苦聲  
相敵

巨蟹

水村紅稻稠茅舍一燈燦  
郭索爾何為引羣爭入  
斲就縛吐饞涎橫行勢難  
窺謀食致忘軀養生宜  
善算

茉莉

最憐纖手摘相伴玉釵寒  
得氣烏雲裏花開夜未  
闌

珠蘭

氣足已盈盈粟黃何瑣瑣  
西軒醉月人酒醒惟君  
可



百合花

抱甕不辭勞有蔬兼有卉誰知蚓竅微吐作梅檀  
氣

子午花

細草如錢花也乘陽氣茂開落不違時恰應金壺  
漏

僧鞋菊

何年隻履歸花裏經行慣不是竊香人禁他美目  
盼

碎金花

瞥眼草根黃星星如熠燿誰將瑣碎金欲買佳人  
笑

美人蕉

冷綠承朝露疎紅浸夕陽美人相對久心轉益淒  
涼

秋牡丹

瘦影憐秋豔芳名媿鼠姑縱然非國色忍使伴蘼  
蕪



斜陽

蟬嘶谿樹碧風過渚蒲香回首斜陽裏驚看鶴影長

客過

短榻擁書坐輕帆撲雨來相逢無別語但問菊花開

贈客

落魄翻因湖海遊十年書劍老孤舟莫言津吏抽分苦但稅行裝不稅愁

中秋待月二首

昨夜清輝照倚闌今宵底事隱雲端嫦娥也惜傾城色不許人間着意看

處處笙歌簇水濱故吹涼雨灑芳塵多情定有松間月來照中宵未醉人

錢園尋菊贈曉城次圭菴韻四首

一年兩度到城隈紅藕開來紫菊開相見贈貽惟斷句欲畱淳朴挽衰頹

梧陰書屋碧溪隈蓬戶時因藜杖開突見南山當



面起始知城上晚雲頽  
舌耕歸自破山隈不負名花此日開  
相約與君盟  
晚節東籬人醉日西頽  
寒露黃花照檻隈只因遇閑故先開  
一年勤苦三  
旬看別蠹分苗興未頽

古香樓吟藁卷一終

古香樓吟藁卷二

休陽汪文柏柯庭  
菊影四首

丘園高蹈識芳名入室忘形夜氣清  
數武淡香分對榻一窗生意出孤檠  
多情彭澤詩偏少沒骨僧繚畫未成  
夢斷枕屏畱傲態釭花開盡月添明  
五柳先生解綬歸離離靜影坐成圍  
出塵有意凌青女面壁無心待白衣  
傲氣尚存形是累婉容能寫色全非  
相憐相弔誰為主霧重燈昏已漸微



古香樓吟藁  
一  
篝燈斜照粉牆間  
枝葉分明似可攀  
竟夜不移香不染  
晚年相對意相關  
解衣潑墨臨偏反  
扣戶邀人數往還  
嫩蘂釀成光色好  
更宜杯底見南山  
炙茗呼朋月下看  
西風習習袷衣寒  
入神欲授嫦娥筆  
枵腹寧加楚客餐  
雲過去來惟有象  
霜前稱賞豈無端  
悠然自寫幽人致  
不向菱花竝舞鸞

水中鴈字二首

斜行似寫行波箋  
最是瀟湘八月天  
但識雲書山頂見  
未聞鳥跡水中傳  
墨痕沉着垂垂雨  
楷法糝

糊淡淡煙俯察仰觀無二理  
點頭一畫契真詮  
萬里懷人有尺書  
勞勞何必走雙魚  
相思目送天應老  
一見愁生水不如  
逐墨尋行成捕影  
奔泉挾石總涵虛  
漆園秋水新添註  
盡付東流到草廬

晚步

秋水沿籬脚  
蒼苔過石脣  
日沉歸鳥疾  
煙退草花新  
律細吟難愜  
機清悟自真  
小園尋橡栗  
緩步側烏巾

竹



偶臨孤閣上秋浪滿園生風過枝枝亞江清箇箇  
明忽聞深谷響有客短琴橫瑣碎穿窗影偏宜弄  
晚晴

得東燦信知由新安來

自楚反乎浙新安江上行疎林平落照一雨壯灘  
聲魚戲清能數鷗飄遠自輕計程知己近新漉酒  
盈盈

陳友聲抵夜至

吾愛陳驚座燈前一棹來履聲初及戶鬚影遂潛

杯帶下逢時尚壺中困軼才翻思懸榻後圓月已

多回

陳氏世業女醫友  
聲尤深邃其學

送徐東集赴太原就婚即入都謁選

欲別停舟氣誼親羨君文藻揆 楓宸鴛湖遺挂  
傷鴛偶鴈塞新迎奠鴈人枕上翻清教易就鏡中  
含笑看逾真行將捧檄臨花縣莫泥檀郎共跳神

九日霜降二首

登高看演武時節共爭新落帽逢青女吹笳祭纛  
神百年身是客千里鴈來賓趁健須行樂因悲送



菊人

鄰友馮君去年九日送  
黃花十本今秋奄逝矣

郊原秋雨霽緩步莫匆匆斜月喧金鼓西風勁角  
弓軍威今日肅花笑去年同邨野欣欣色盈疇穉  
稭紅

有感

犇駛雙丸亦底忙井梧辭碧菊爭黃相逢但見他  
人老知己誰憐故態狂逸興欲飛杯面月禪心未  
却鏡中霜垂簾握固寒宵坐蟲語淒涼曲象牀

謂閉目  
為垂簾

蓉江四十贈言

蘭譜因兄事較予一歲強談經虛左席角藝恃長

鎗上叟應齊壽中元恰捧觴

蓉江自言其夫人眇一目  
故以應璩詩中語為祝

潛身

雞鶩隊海鶴自昂昂

葉仙源移居桃花塢寄贈二首

久作蕪陰客新遷桃塢家印牀工鳥篆綵筆吐煙  
霞意到人尤羨名傳髻已華待移書畫舫採菊共  
烹茶

不見佯狂老愁吟我所思晚雲唐子墓秋水讓王



祠菊綻持螯日桑摧釀酒時幾回疑爾過新月照  
茅茨

祝家秋原七十

何必餐霞與御風煙雲供養健難同情移好處從  
詩外意到渾身入畫中松壑檢書千葉翠菊籬稱  
壽一樽紅山林大雅如今少盛說吾家有此翁

黃省三新治書屋庭前栽菊數十種哲兄圭

菴額其齋曰勝友索句以贈

江村生業盡桑麻秋錦偏多處士家伯子學成難

作弟主人情淡却如花無言靜對渠應勝有酒頻  
斟爾自誇夜坐細叅香色外更添幽影到窗紗

次和王丹麓六句自壽三首

松雲皓首卧清時齒冠耆英定不疑賢主嘉賓逢  
豈易良辰美景樂堪爲哺勤弱燕穿花影舞困垂  
楊帶雨枝如錦六橋能介壽武林春酒勝鷺兒  
長年纂輯不虛時考核精詳少缺疑放鶴偶探高  
士跡雕蟲偏自壯夫爲文心皎映冰壺月綵袖輝  
聯玉樹枝傳得胎仙真火候酒腸滌淨養嬰兒



讀書談道自安時如雪襟懷豈蓄疑  
勘破窮通原有命包藏經濟在無爲  
出籬花笑遷鶯樹隔岸巢成挂月枝  
攜酒吳山時縱目盤空誰放決雲兒

湯萍菴過訪以山中好書箋見贈

見說山中好攜家願結鄰心微能辨物  
意切反疑

人

萍菴得授雲莊程子之學從辨物入門其發人疑處正是爲人痛切處故有三疑六感說藏養豹山中

竹徑鳴泉細

風簾過葉頻滿囊珠玉燦垂老未爲貧

同曉廬辰令念武鶴軒家耀姪過陶圃訪菊

率筆示菴主仁岳

艤棹柳洲亭尋芳入陶圃路杳共披榛  
蹊窮纔及戶秋錦艷空庭紫絨雜金縷  
細種一時開繁英難盡數寶相自莊嚴  
鶴翎如起舞松殼未爲奇蜂房最堪覩  
幽靜香氤氳絢爛日卓午所務去青牛  
未妨棲粉羽霜凌傲氣餘露吸芳心苦  
插竹似扶筇脫稜如解組灌宜噴壺泉  
移便瓦圈土客賞詠陶詩僧栽依菊譜  
愛此屋三間藏之雲一隲浮生徒自忙  
感今猶視古雙丸豈暫停如矢發諸弩  
謀歡苟失時缺事焉能補良友幸同遊  
清談借尊俎吟



倦可忘歸佛龕成卧所荷鍾效劉伶放歌摹杜甫  
身許入雙峰禪非求七祖狂象赤手調妙義青蓮

吐

杜少陵詩身許雙峰寺門求七祖禪錢宗伯箋本剖釋極詳

浮海梁朝僧折蘆如曳櫓

神光問道勤臂斷雪埋股傳法得安心燈一旋分  
五宗旨雖各殊盡捐十二部教外有單傳直從言  
下取隻履久西歸瓣香酬法乳堪笑野狐禪亦將  
槌拂豎具眼豈無人摸象笑羣瞽此事爾應知試  
問菴中主

過山曉閣訪孫執升

新攬包山勝衣霑橘袖香歸情縈小閣山氣出奚  
囊促膝疑春夢移舟限夕陽幾時攜卷帙篝火共  
丹黃

祝張曉廬六十次錢蔚宗先輩韻

向聞綵袖誇賢胤新抱文孫拜阿翁室似維摩容  
客位居鄰畫隱繼高風按書目炯雙行下洗硯心  
枯八法中豈獨茱萸能勸飲漢宮秋色鴈來紅

同曉廬雪坡飲青谿草堂是夜泛舟至吳門  
每坐清齋憶隱淪從今過我願頻頻菊香新盥持



螯手松勢如招秉燭人畫可通靈隨興至詩因感  
舊見情真予有感舊詩憶二十年前客草堂者七人今惟雪坡獨存樽前未忍輕離別同  
泛蘭舟剪白蘋

洙涇魯烈婦詩

并序

烈婦本張姓其父爲魯氏養子有魯屏者乞爲  
女及長妻其子祥家洙溪之西市距萬安橋不  
數武會流水駛地當江浙襟喉商舟絡繹羣妓  
環處其間祥母沈故娼也與祥給婦爲娼不可  
屢加捶撻或減其衣食積三載餘志益堅終不

能奪烈婦以死自誓預告其父母曰壻家以貧  
致此兒將死死兒命也慎毋抵壻於罪一日祥  
母憤欲劫之烈婦知其不免遂紉襟裾潛啓後  
戶躍急湍而死里人初求其屍不得越八日仍  
獲於秀州塘顏色不少變裙袂完整於波濤間  
觀者如堵咸驚爲神異有泣下不能已者願營  
其墓立祠以祀之郡守龔公爲文勒石寓夫勸  
懲之意深焉夫匹夫匹婦自經溝瀆者夫率懷  
積怨深憾冀其雪於身後也乃烈婦以義命自



安身死而懼傷其夫預陳父母前以免之吁可  
悲也已况失身汙濁之中不因俗移不爲威攝  
卒潔其身以死是亦難矣世之隨波者流聞烈  
婦寧無少愧乎丁丑秋余舟行過此知其詳爲  
之三歎因賦其事貽諸同人各爲詩文以風斯  
世云

彤管誌孤貞其事難枚舉從容自引決半屬巾幗  
侶奇哉不辱身乃有青樓女端莊本性成目不窺  
廊廡父曾作螟蛉誤配歸于魯食貧良自甘粗糲

度寒暑詎意茲里中摩登伽所聚目挑復心招不  
識機與杼夫歎姑益惡迫之倚門戶婦意不可廻  
日夕加箠楚自知無生理私語媪及父我死憐夫  
貧切莫拘園土茹荼三載餘姑怒如虓虎細紉身  
上衣潛投急流處屍浮秀州塘八日猶不腐閭閻  
競聚觀欷歔不知數村嫗亦何知登墓時懷糈異  
事須表揚僉謀達官府豐碑七尺高卓立河之滸  
嗚呼此奇節古今未易覩如彼渭與涇分流各歸  
渚亦如青蓮花淤泥中自吐以此勵澆風名教庶



有補

世英堂詩二十韻

為元侯成  
寧張公賦

江左資彈壓元侯節制年德威騰海甸氣象逼星  
 躔許史寧齊貴班楊有鉅篇焚香時引鶴注傳每  
 懷鉛瞻仰天章煥經營地勢堅飛甍臨日麗高  
 棟接霞鮮額自楓宸降堂開御筆懸書從萬  
 機暇光燭九峰邊玉軸盈箱列金題插架聯廻鋒  
 同鳳翥轉掣若龍騫公奉賜御書堂額外有宸翰二十  
 餘種悉裝潢成懷及卷軸陳于几案間別  
 館如翬起清池瀉鏡圓畫檐聞燕語綠樹待鶯遷

彝鼎焜煌設圖書甲乙編石奇分向背花躡態便  
 娟選暇偕賓客清遊試管絃衣冠軍府肅節鉞上  
 公賢棟萼連枝遠弓裘賜祿綿公家世襲侯爵至  
 十葉乃互古曠典催畊小  
 隊出闕武萬人旋舊績丹青炳新功金石鐫斯干  
 羣有賦下里託瑤箋

題薛辰令小照二首

辰令婁東人僑居武塘  
善畫宋元諸大家山水

木葉承趺晏坐平脊梁豎起杖初橫只愁餘習依  
 然在萬壑千巖一念生圖寫僧裝結跏  
 趺坐一杖橫於地  
 變幻煙雲入靜觀硯池餘墨染幽瀾布裘麥飯粗



能給寸管何殊一粒丹

武塘有  
幽澗泉

留春圃感舊和圭菴二首

花繞欄杆水繞樓欲藏春色似藏舟即今歲歲春  
仍至纔信春留圃不留

苦心位置亦悲夫聽爾長歌淚欲枯眼底有成皆  
有壞只留仙館在虛無

內子四旬閨秀羅鶴鄰寫優曇花爲祝因題  
希有天花玉腕傳細叅色相六根圓從今慧業頻  
增進不似人間草木年

讀留春圃紀勝諸詠再疊前韻貽圭菴四首  
翠羽紅襟入畫樓柳絲輕影罩漁舟陽和有脚能  
遮住何處遊人不少留

寒林索莫漫嗟夫細雨如膏已潤枯開到荼蘼春  
又去問伊歸處爾知無

詩中有畫畫中樓共案如乘李郭舟二十四番風  
已過一腔生意自長留

莫學之乎與蓋夫埋頭帖括到心枯江山風月誰  
能主尋箇閑人今絕無



冬至吳淞道中

吳淞木落曉煙橫穩坐中流五兩輕山似蛾眉鈎  
慢見冰如環珮送舟行日逢南至關難閉潮自東  
來岸欲平處處人家畱遠客金盞玉鱠薦新秔

王麓臺給諫過訪兼貽詩畫次韻酬之

風裁諤諤早澄清繚繞煙雲腕底行偶愛湖山畱  
嘯傲不因塵鞅逐紛更歡迎舊雨添新興詩寫無  
聲却有情最恨春潮催畫鷁綠陰凝睇短橋橫

題畫蘭賀臧清侯合巵四首

春來何事最相宜逸韻無如謝氏姿竝蒂花開香  
滿室襲人衣袂一枝枝

覩影聞香睡正酣夢回知是叶宜男久應紉作騷  
人佩畫譜新翻鄭所南

兩兩相看益有餘如賓如友意初舒只緣道味能  
悠永不比尋常蹤跡疎

芳蘭自有幽情性欲得丰神事亦艱何若畫眉臨  
繡閣試於鏡裏看青山

炎貞新構書樓落成次耕煙肆夏韻二首



鋤茅開徑乍成樓高啄簷牙接樹頭堆架千函常  
拄腹插雲雙塔足凝眸金昆登眺裁新詠石隱盤  
桓嬾放遊自有昔年弘正樂無須趙舞與齊謳  
未許疎狂作浪遊每同姚合日登樓坐花檢韻情  
應適待月清談事更幽理學源流欣有伴羹牆時  
對復何求春來睥睨添佳興斗酒容予聽栗留

送熹姪秉鐸桐江四首

河干帆影動念汝欲之官捧檄過書院橫經近釣  
灘竹林懷舊晏冰署慎加餐爲國儲才地休嫌苜

菹寒

暫借扶風席讀書山水鄉虛懷休自足遜志願無  
荒豹欲深藏霧錐寧久處囊秋闈期慰我績學早  
騰驤

延陵推國士風雅夙知名世好情原密同寅誼匪  
輕作人欣有助麗澤獲相成細敘江鄉舊清齋話

短檠

謂同寅  
吳子六階

宗盟昔司鐸化育起黌宮爾去循良轍人爭重道

風

前時元亮宗兄由  
此升任其教士可法

梧溪歸省便梓里湖洄通兩地煙



波接家郵各易逢

復竇文正公祀田紀事

元儒竇默祠在肥鄉縣邑人郝公  
函請復祀田延顏習齋講學於此

元代有鴻儒薄田供祭掃旋爲強者侵塋荒肥水  
隩我朝重前賢曠典素崇報封墓而式閭近益頒  
詔誥郝君心不平首爲邑令告因得歸汶陽澤如  
陰雨膏俎豆有贏餘郝君情復浩累彼所剩資立  
塾明有造時延儒家宗闡學嚴教導希入聖域深  
君子相慥慥肥鄉戶可封頓覺多自好文治蔚然  
興士林聲更噪願世同此風敦行而遠暴

讀喟亭侍御愛梅詩題其後

秋窗讀公愛梅詩皎皎風骨令人思江南地暖花  
如海水邊林下無人知不圖青史金門客偏恐巡  
簷索笑遲画谿園中早春放玉爲葩兮雪作肌荆  
谿方丈三百樹紛紛開落惜過期九都繽紛方艷  
發寒香撲面堪娛嬉興來策蹇尋山麓時復放艇  
江之湄太初手植延佇久鴛鴦湖畔香風吹鄧尉  
西谿堪悅目山山如雪烘朝曦萬玉菴中梅最古  
一枝旁茁花紛披我公到處攜蠟屐綵毫在手詩



囊隨人如水部才復擅廣平賦手姑射姿我因親  
誼共談笑公言花癖誠難醫品題花事鄧尉最還  
有羅浮景更奇

題壽聖寺善繼禪師血書華嚴經

金閭門外山塘路來往遊人紛似鷺出門不逐看  
花羣蕭寺翻經時獨赴老僧知我意慙慙急請開  
函消夙慕一襟煩熱頓清涼大似焦芽灑甘露永  
明自是天人師庫錢散作放生貲白刃臨頭了無  
懼放歸之日隨披緇至人無來亦無去爲乘願力

人間住瀾翻宗鏡說初完又向半塘寺中遇南詢  
煙水渺無窮樓閣門開彈指中其間妙諦難敷演  
且寫貝葉藏花宮松煤黑汙不可用丹砂炫眼令  
人矇金銀作屑總外物捨所易捨非吾從最難捨  
者身中血充足則生枯則絕我今將報世雄恩十  
指如鎚俱刺裂和香蘸取錄真言八十一卷無差  
別要知不是凡間書豈效銀鈎與釵折須教字字  
放光明何異造論蓮生舌莊嚴法寶信堪珍呵護  
天龍及鬼神須臾現作宰官身濂溪學士即其人



再來題讚知前因物換星移歲月深有力負趨愁  
難尋吾家司馬能購取藏諸精舍曰肇林香雲繚  
繞朝夕供隱隱如聞金口音寺僧曇旭來堅請鐸  
返珠還畱至今嗚呼我聞東坡前身爲五戒會心  
禪悅如針芥只今三世等循環滴滴血書終不壞  
十玄六相舊曾探五十三叅妙理含似此因緣信  
奇特瓣香親爇禮瞿曇

生日

生長紅塵擾擾間十年養就寸心閑衝渠水駛難

將月眩眼雲奔未捲山滿舍雞豚情浩蕩虛文屏  
幃色編爛道人自有安身處獨坐松陰看白鷗

題畫贈金筑道侶

古松流水聚仙羣石上時翻金碧文鶴背負來千  
嶺月棋聲敲散一庭雲

題廬山圖送借山上人二首

斷句泠泠大雅音夜闌軟語得披襟剪燈細看廬  
山畫已起宗雷入社心

芒屨來自五臺山神往屏風九壘間白鹿巖前遙



待客爲予一訊虎谿灣

蔣葑田過訪以詩字見貽次韻漫酬

戲鴻書法寫新詩妙似羲之又牧之靈悟何曾勞  
劍舞錦心原不讓機絲愁因歲晚舟難繫誼向杯  
深醉莫辭縱使尋芳能踐約挑燈應費幾回思

留曉廬度歲用前韻

穩作消寒唱和詩君如白傅我微之同聲小鳥知  
求友共繭春蠶好吐絲心地漸寬功已立硯田粗  
給祿堪辭拚教醉弄梅花月不學張衡賦所思

歲暮貽圭菴荅江用前韻

幾年燈火快評詩莫問行藏任所之遊遍青山偕

綠齒

今年偕荅江兩遊茗  
雪頗盡登臨之樂

坐憑烏几共紅絲狂來每爲賢

人酒

荅江善飲  
每多醉况

老去偏多幼婦辭

圭菴年彌老而吟興益  
壯時同硯席不倦唱酬

歲晚

豈教輕易別滄江風雪繫人思

徐丙文卧病西菴寄予新詩有巧到老來都

是拙文成病後更無奇之句依韻荅之

莫道文章不合時籬根冷語見襟期紛華似綺翻  
爲陋圓轉如丸始是奇病渴可知禪悅味浪遊誰



賞客愁詩勸君早覓安心法何用勞勞費苦思

寒宵漫興索曉廬圭菴荅江同和二首

卒歲忘愁緒聯詩快友情窗開梅影入衣動芋香  
生犬吠谿冰折鴉驚堠火明乾坤方閉塞又見一  
陽萌

水涸晴光久冬殘雪片稀留賓時下榻彈燭夜開  
幃酒剩廚人悅年豐稚子肥詩城賴秦系一戰解  
重圍

得三君和詩再疊前韻

耐寒成晚翠松竹見交情撼座驚濤過依簾細靄  
生驪珠歸禹錫蚓竅學彌明抵掌聽君話心花一  
夜萌

不知芳歲盡但覺客來稀月浸縹緗閣風欺翡翠  
幃深情偏落穆大志豈輕肥累索休文和能無減  
帶圍



古香樓吟藁

卷一

古香樓吟藁卷二終





